

Sumáriu Kazu
Tribunál Judisiál Primeira Instáncia Oekusi
Dezembu 2024

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Oekusi

1. Totál kazu ne'ebé JSMP monitoriza: 8

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	8
Totál		8

2. Totál desizaun ne'ebé JSMP monitoriza : 8

Tipu pena	Artigu	Númeru
Suspensaun ba pena prizaun nia ezekusaun	68 KP	2
Suspensaun ba pena prizaun ho devér adisonál	68 no 69 KP	2
Pena multa	67 KP	4
Totál		8

3. Total kazu sira ne'ebé kontinua prosesu tuir JSMP nia monitorizasaun: 0

B. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0095/24.OESIC
Kompozisaun Tribunál : Singulár
Juis : Dr. Evangelino Belo
Prokuradór : Dr. Claudino do Rosario
Defeza : Dr. Afonso Gomes Fatima
Desizaun : Pena prizaun fulan 6 suspende ba tinan 1 ho devér adisonál

Iha 09 Dezembru 2024, Tribunál Judisiál Primeira Instánsia Oekusi, prezide leitura sentensa ba krime ofensa ba integridade fízika simples ho natureza VD ne'ebé envolve arguidu AC hasoru nia feen, iha RAEOA.

Akuzasaun Prokuradór

Prokuradór akuza katak iha 03 Juñu 2024, maizumenus iha oras tuku 12:00 kalan, arguidu fila ba uma ho kondisaun lanu ba liu kuartu laran toba. Maibé ofendida sei loke kuluna (*spiker*) hodi rona múzika. Tanba ne'e, arguidu hader hodi taka no ko'alia ba ofendida dehan "*kalan bo'ot ona atu toba labele halo barullu!*". Hafoin dehan tiha nune'e arguidu basa dala ida iha ofendida nia tilun hun parte karuk besik kakorok no rezulta ofendida sofre moras, tanba ofendida sente moras ho arguidu ninia agresaun ne'e, nune'e ofendida tebe kuluna gravadór (*speaker*) halo monu tun ba iha rai, nune'e arguidu buti ofendida nia kakorok ho maka'as rezulta ofendida sofre moras iha kakorok.

Tuir mai iha 04 Juñu 2024, maizumenus iha oras tuku 14:00 lokraik, arguidu foti faru manas (*jaket*) sae kareta atu tun mai Oekusi vila no ofendida hateten ba arguidu katak "*ó lor-loron la halo buat ida, hein de'it kareta ida mosu mai ó sa'e tuir hodi badiu tun sae, depois fila mai uma ho kondisaun lanu hodi halo violénsia mai hau*". Tanba rona ofendida ko'alia nune'e, arguidu tun hosi kareta, buti ofendida nia kakorok ho maka'as rezulta moras. Nune'e ofendida halai ba nia avo nia uma. Maibé arguidu ba tuir hodi tebe dala ida iha ofendida nia kanotak rezulta moras, foti ai-sanak baku dala ida iha ofendida nia ulun no baku iha ofendida nia kakorok no hanehan ho maka'as ofendida nia kanuruk. Arguidu kontinua rakut ofendida nia hasan parte karuk rezulta kanek no mean, hafoin tuku tan dala ida iha ofendida nia ulun kauza ofendida sofre moras. Kazu ne'e aneksa hamutuk ho relatóriu médiku hosi PRADET no fotografia hosi polísia-VPU kona-ba aktu violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3 (a), 35 (b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun prokuradór nian, arrepende nia hahalok, promete sei la halo tan hahalok hanesan hasoru ofendida iha futuru. Arguidu haktuir katak nia di'ak malu ona ho ofendida, foin primeiravés mai hatan iha tribunál. Arguidu hatutan katak hanesan agrikultór, laiha rendimentu fiksi no seidauk iha oan.

Entretantu, ofendida kontinua konfirma faktu sira iha akuzasaun inklui deklarasaun arguidu nian katak di'ak malu ona. Ofendida haktuir tan katak moris hamutuk ho arguidu iha tinan 2021, seidauk iha oan no iha momentu ne'eba arguidu baku ofendida ho kondisaun lanu, depoisde akontesimentu ne'e arguidu maka tuir ofendida ba iha ofendida nia família nia uma hodi husu deskulpa no agora arguidu la hemu ona tua no moris hamutuk nafatin hanesan feen la'en to'o agora laiha tan problema seluk.

Alegasaun finál

Prokuradór konsidera arguidu provadu komete krime hasoru ofendida tuir faktu sira iha akuzasaun prokuradór nian bazeia ba arguidu nia konfisaun. Mezmu arguidu di'ak malu ona ho ofendida, maibé haree ba realidade katak krime violénsia doméstika kontinua akontese iha Oekusi, nune'e husu ba tribunál atu kondena arguidu ho pena prizaun tinan ida fulan neen suspende ba tinan rua.

Entretantu, defeza husu ba tribunál atu kondena arguidu ho pena ne'ebé adekua ho konsiderasaun katak arguidu konfesa integralmente ba faktu sira no arrepende ninia hahalok. Alende ne'e depoisde akontesimentu to'o agora laiha ona problema seluk no kolabora di'ak ho tribunál, di'ak malu ona ho ofendida no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu halo duni agresau fízika hasoru ofendida dala-barak no konsidera hahalok arguidu nian hanesan dolu direitu tanba ho hakarak rasik halo agresau fízika hasoru nia feen.

Bazeia ba faktu provadu sira hotu no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál, di'ak malu ona no moris hamutuk iha tinan 2021 to'o agora seidak iha oan no laiha rendimentu fíksu. Tanba ne'e tribunál konklui prosesu ne'e no kondena arguidu ho pena prizaun fulan neen suspende ba tinan ida no devér adisionál atu arguidu halo limpeza iha sede suku fulan ida dala ida, iha inísiu fulan durante fulan haat nia laran.

2. Krime ofensa ba integridade fízika simples ho natureza violénsia doméstika

Nú. Prosesu	: 0022/23.OEOSL
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Claudino do Rosario
Defeza	: Dr. Calisto Tout
Desizaun	: Pena multa US\$45.00

Iha 10 Dezembru 2024, Tribunál Judisiál Primeira Instánsia Oekusi, prezide leitura sentensa ba krime ofensa ba integridade fízika simples ho natureza VD ne'ebé envolve arguidu PSL hasoru nia feen, iha RAEOA.

Akuzasaun Prokuradór

Prokuradór akuza katak iha loron ne'ebé la apura maibé iha Agostu 2023, maizumenu iha oras tuku 17:00 lokraik, arguidu basa dala ida iha ofendida nia liman parte karuk rezulta moras maibé ofendida la hato'o keixa. Tuir mai iha loron ne'ebé la apura maibé iha Outubru 2023, arguidu ameasa atu taa mate ofendida, maibé ofendida lahato'o keixa hasoru arguidu.

Tuirmai iha 09 Outubru 2023, maizumenu iha oras tuku 09:30 dadeer, arguidu ameasa dehan "*atu taa mate ofendida*", arguidu hirus tuku dala ida iha ofendida nia liman parte loos rezulta moras, arguidu kontinua fakar hotu tua ne'ebé sira faan no kontinua ameasa ofendida katak kuandu keixa ba

polísia arguidu sei taa mate ofendida. Tanba ne'e ofendida senti ta'uk hodi hato'o keixa hasoru arguidu. Kazu ne'e aneksa hamutuk ho relatóriu médiku hosi PRADET no fotografia hosi Polísia-VPU kona-ba aktu violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3 (a), 35 (b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira hotu iha akuzasaun, arrepende nia hahalok, husu ona deskulpa ba ofendida, di'ak malu ona no promete sei la repete nia hahalok ne'e hasoru ofendida ka ema seluk iha futuru. Arguidu serbisu hanesan toos na'in, laiha rendimentu fiksi kada fulan, iha oan na'in haat no arguidu mak iha responsabilidade maximu ba iha nia família.

Iha parte seluk ofendida kontinua konfirma faktu sira hotu iha akuzasaun no deklara katak de poisde akontesimentu ofendida ba iha Uma-Mahon no toba kalan ida. Liu tiha loron ida ofendida fila ba uma arguidu husu deskulpa ba ofendida no kontinua moris hamutuk nafatin hanesan feen la'en.

Alegasaun finál

Prokuradór konsidera arguidu provadu halo agresaun fízika hasoru ofendida tuir faktu sira ne'ebé hakerek ona iha akuzasaun. Arguidu nia hahalok ne'e prejudika tebes ofendida. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza husu ba tribunál atu kondena arguidu ho pena ne'ebé kmaan ho konsiderasaun katak iha produsaun ba prova arguidu kolabora di'ak ho tribunál no konfesa faktu hotu iha akuzasaun, arrepende nia hahalok, iha oan na'in haat, serbisu hanesan toos na'in laiha rendimentu fiksi kada fulan no arguidu mak iha responsabilidade maximu ba iha nia família.

Desizaun

Depoisde avalia faktu hotu, tribunál konsidera arguidu provadu halo duni agresaun fízika hasoru ofendida tuir faktu sira hotu ne'ebé hakerek ona iha akuzasaun prokuradór nian.

Bazeia ba faktu provadu sira ne'e hotu no tetu mós ho sirkunstánsia agravante sira hanesan arguidu ameasa ofendida no fakar hotu tua ne'ebé mak sira faan. Entretantu tribunál tetu mós ho sirkunstánsia atenuante sira hanesan arguidu konfesa, arrepende nia hahalok, husu ona diskulpa no di'ak malu ona ho ofendida no promete sei la komete tan krime hanesan iha futuru hasoru ofendida ka ema seluk, nune'e tribunál konklui prosesu ne'e no kondena arguidu ho pena multa US\$45.00, ne'ebé kada loron arguidu sei selu 0,50 sentavus, durante loron 90. Tribunál mós fiksa pena alternativa loron 60 iha prizaun, bainhira arguidu la kumpri pena multa refere.

3. Krime ofensa ba integridade fízika simples ho natureza violénsia doméstika

Nú. Prosesu : 0312/23.OESIC
Kompozisaun Tribunál : Singulár
Juis : Dr. Evangelino Belo
Prokuradór : Dr. Mateus Nesi
Defeza : Dr. Afonso Gomes Fatima
Desizaun : Pena prizaun tinan 1 fulan 2 suspende ba tinan 1
fulan 2 ho devér adisionál

Iha 18 Dezembru 2024, Tribunál Judisiál Primeira Instánsia Oekusi, prezide leitura sentensa ba krime ofensa ba integridade física simples ho natureza VD ne'ebé envolve arguidu EnB hasoru nia feen, iha RAEOA.

Akuzasaun Prokuradór

Prokuradór akuza katak 14 Dezembru 2023, maizumenus iha oras tuku 20:00 kalan, arguidu tuku dala rua iha ofendida nia hasan parte karuk no resulta kanek kois, metan, bubu no moras. Arguidu mós tuku dala ida iha inus no resulta kanek, raan no moras, rakut ofendida nia fu'uk no buti iha kakorok resulta moras. Arguidu kontinua tebe tan dala rua iha ofendida nia kabun kauza moras to'o ofendida desmaia no monu ba rai. Kazu ne'e akontese ofendida isin rua (*gravida*) fulan lima. Antes agresaun ne'e, ofendida husu osan US\$20.00 ba arguidu atu hola foos, nune'e arguidu ho ofendida diskute malu to'o mosu agresaun ne'e. Kazu ne'e aneksa hamutuk ho relatóriu médiku hosi PRADET no fotografia kona-ba aktu violénsia ne'e hasai hosi polisia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 prizaun ka multa, konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun, arrepende ninia hahalok, di'ak malu ona ho ofendida, foin primeiravés halo krime hasoru ofendida no promete sei la repete ninia hahalok ne'e hasoru ofendida ka ema seluk iha futuru no nu'udar motorista ho vensimentu kada fulan US\$115.00.

Alende ne'e, ofendida kontinua konfirma faktu sira iha akuzasaun no deklarata katak depoisde akontesimentu ne'e ofendida ba hela tiha iha PRADET durante loron rua hafoin PRADET refere fali ofendida ba hela iha Uma Paz Oekusi durante semana ida mak foin fila ba uma. Ofendida hatutan katak liu tiha loron haat mak moras sira ne'e rekopera. Ofendida mós haktuir katak nia perdua ona arguidu no to'o agora arguidu la baku ona ofendida.

Alegasaun finál

Prokuradór konsidera arguidu ninia aktu ne'e priense elementu krime ofensa ba integridade física simples ho natureza VD no iha akontesimentu ne'e ofendida isin rua (*gravida*) hela fulan lima. Tanba ne'e, husu ba tribunál atu aplika pena ne'ebé hakerek ona iha artigu 145 KP, nu'udar prevensaun ida ba arguidu atu la repete hikas ninia hahalok ne'e iha futuru.

Entretantu, defeza husu ba tribunál atu aplika pena ne'ebé adekuadu tuir arguidu nia sala ho konsiderasaun sira katak arguidu konfesa, arrepende ninia hahalok, di'ak malu ona ho ofendida, foin primeiravés halo krime hasoru ofendida no promete sei la repete ninia hahalok ne'e hasoru ofendida ka ema seluk iha futuru. Alende ne'e, serbisu nu'udar motorista ho vensimentu kada fulan US\$115.00.

Desizaun

Depoisde avalia faktu sira hotu tribunál prova katak arguidu tuku dala rua iha ofendida nia hasan parte karuk, tuku dala ida iha inus, rakut ofendida nia fu'uk, buti iha kakorok, tebe dala rua iha ofendida nia kabun kauza moras to'o ofendida desmaia no monu ba rai no iha akontesimentu ne'e ofendida isin rua (*gravida*) hela fulan lima.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan ida fulan rua suspende ba tinan ida fulan rua. Tribunál mós aplika devér adisionál atu arguidu halo limpeza iha sede suku fulan ida dala ida, iha inísiu fulan durante fulan haat nia laran.

4. Krime ofensa ba integridade fízika simples ho natureza violéncia doméstika

Nú. Prosesu	: 0024/24.OEPMK
KompozisaunTribunál	: Singulár
Juis	: Dr. Evangelino Belo
Prokuradór	: Dr. Mateus Nesi
Defeza	: Dr. Afonso Gomes Fatima
Desizaun	: Pena multa US\$67,50

Iha 18 Dezembru 2024, Tribunál Judisiál Primeira Instánsia Oekusi, prezide leitura sentensa ba krime ofensa ba integridade fízika simples ho natureza VD ne'ebé envolve arguida LO hasoru nia laen, iha RAEOA.

Akuzasaun Prokudadór

Prokuradór akuza katak iha 13 Marsu 2024, maizumenus iha oras tuku 23:00 kalan, ofendidu tama tuir arguida iha kuartu laran hodi husu atu halo relasaun seksuál hanesan feen-la'en maibé arguida lakohi, maibé ofendidu nafatin ezije arguida atu halo relasaun seksuál, nune'e arguida foti tizoura ki'ik ida sona kona iha ofendidu nia orgaun sensitivu parte hun rezulta kanek kois no moras. Depoisde akontesimentu ne'e iha dadeer ofendidu ba halo tratamentu iha Ospital Referál Oekusi hodi simu ai-moruk to'o semana ida mak kanek ne'e foin di'ak fali. Kazu ne'e aneksa hamutuk ho relatóriu médiku hosi PRADET no fotografia kona-ba aktu violéncia ne'e hasai hosi Polísia-VPU.

Prokuradór akuza arguida kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3 (a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun ne'e loos hotu, arrepende ninia hahalok, foin primeiravés halo krime hasoru nia la'en no mai hatan iha tribunál, di'ak malu ona, promete sei larepete hikas hahalok ne'e iha futuru, serbisu hanesan *dona de casa*, laiha rendimentu fiksi kada fulan no iha oan na'in tolu.

Alende ne'e, ofendidu kontinua konfirma faktu sira iha akuzasaun no konfirma mós ho deklarasaun arguida nian katak arguida husu ona deskulpa no di'ak malu ona ho ofendidu to'o agora.

Alegasaun final

Prokuradór konsidera arguida provadu prátika krime tuir faktu sira iha akuzasaun, bazeia ba konfisaun arguida nian no konfirmasaun hosi ofendidu. Atu halo prevensaun jerál krime refere, husu ba tribunál atu kondena arguida ho pena ne'ebé hakerek ona iha akuzasaun.

Entretantu, defeza husu ba tribunál atu kondena arguida ho pena ne'ebé kmaan ho konsiderasaun sira katak arguida konfesa, arrepende ninia hahalok, foin primeiravés mai hatan iha tribunál no husu ona deskulpa ba ofendidu. Aktu ne'e akontese bainhira arguida sente kolen maibé ofendidu nafatin ezije arguida atu halo relasaun seksuál hanesan feen ho la'en.

Desizaun

Depoisde avalia faktu sira hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguida ho pena multa U\$67.50, ne'ebé kada loron arguida sei selu 0,75 sentavus durante loron 90. Tribunál mós fiksa pena alternativa durante loron 60 prizaun, bainhira arguida la kumpri pena multa refere.

5. Krime ofensa ba integridade física simples ho natureza violéncia doméstika

Nú. Prosesu	: 0049/24.OESIC
Kompozisaun Tribunál	: Singulár
Juis	: Dr. Evangelino Belo
Prokuradór	: Dr. Mateus Nesi
Defeza	: Dr. Afonso Gomes Fatima
Desizaun	: Pena multa US\$60.00

Iha 19 Dezembru 2024, Tribunál Judisiál Primeira Instánsia Oekusi, prezide leitura sentensa ba krime ofensa ba integridade física simples ho natureza VD ne'ebé envolve arguida AC hasoru nia oan ho idade (tinan 9), iha RAEOA.

Akuzasaun Prokuradór

Prokuradór akuza katak iha 29 Marsu 2024, maizumenus iha oras tuku 11:00 dadeer, arguida fase tiha ofendida nia fuuk arguida mós sui ofendida nia fuuk maibé ofendida lakohi, nune'e arguida tuku dala ida iha ofendida nia ulun parte leten rezulta ofendida sente moras no tanis maka'as. Ho nune'e viziñu

sira rona hodi telefone kedas polísia no polísia mai kedas iha fatin akontesimentu hodi lori ofendida ba iha PRADET hodi halo kedas ezaminasaun. Kazu ne'e aneksa hamutuk ho reletóriu médiu hosi PRADET no fotografia kona-ba aktu violénsia ne'e hasai hosi polísia-VPU.

Prokuradór akuza arguida kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3 (a), 35(c) no 36 LKVD.

Produsaun ba prova sira

Iha julgamentu, arguida konfesa faktu hotu iha akuzasaun, arrepende nia hahalok, husu ona deskulpa ba ofendida no di'ak malu ona to'o agora laiha ona problema seluk. Arguida mós foin primeiravés mai hatan iha tribunál no promete sei la repete tan hahalok ne'e hasoru ofendida ka ema seluk iha futuru.

Bazeia ba pedidu hosi prokuradór tribunál presinde ofendida nia deklarasaun, tanba iha produsaun ba prova arguida konfesa integralmente ba faktu hotu iha akuzasaun no hosi parte defeza konkorda ho pedidu ne'e.

Alegasaun finál

Prokuradór konsidera arguida provadu halo agresaun fízika hasoru ofendida tuir faktu sira iha akuzasaun. Tanba ne'e. husu ba tribunál atu kondena arguidu tuir pena ne'ebé hakerek ona iha artigu 145 KP.

Entretantu, defeza husu ba tribunál atu aplika pena ne'ebé kmaan ba arguidu ho konsiderasaun katak durante iha produsaun ba prova arguida konfesa faktu hotu iha akuzasaun, arrepende nia hahalok no promete sei la komete tan krime ne'e iha futuru.

Desizaun

Depoide avalia ba faktu tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguida ho pena multa US\$60.00, ne'ebé kada lora arguida sei selu US\$1.00 durante lora 60. Tribunál mós fiksa pena alternativa durante lora 40 prizaun, bainhira arguida la kumpri pena multa refere.

6. Krime ofensa ba integridade fízika simple ho natureza violénsia doméstika

Nú. Prosesu	: 0003/24.OEOSL
Kompozisaun Tribunál	: Singulár
Juis	: Dr. Evangelino Belo
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena multa US\$120.00

Iha 20 Dezembru 2024, Tribunál Judisiál Primeira Instáncia Oekusi, prezide leitura sentensa ba krime ofensa ba integridade fízika simples ho natureza VD ne'ebé envolve arguidu CL hasoru nia feen, iha RAEOA.

Akuzasaun Prokuradór

Prokuardór akuza katak iha 06 Marsu 2024, maizumenus iha oras tuku 23:00 kalan, ofendida ho arguidu sai ba liur hodi buka tuir manu inan, tanba laho mak book halo manu inan semo sai hosi luhu laran. Tanba la hetan manu refere, ofendida tama uluk ba uma laran, nune'e arguidu bolu ofendida dehan "*lori lampra mai lai para leno,*" maibe ofendida hatan ba arguidu katak "*husik ba lalika buka ona*". Nune'e arguidu ba foti lampra hodi baku dala ida iha ofendida nia hasan, rezulta kanek kois, bubu, metan no moras. Kazu ne'e aneksa hamutuk ho relatóriu médiku hosi PRADET no fotografia hosi Polísia-VPU kona-ba aktu violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3 (a), 35 (a) no 36 LKVD.

Produsaun ba prova sira

Iha julgamentu, arguidu konfesa faktu sira ne'ebé hakerek ona iha akuzasaun, arrepende ninia hahalok. Depoisde akontesimentu ne'e, ofendida halai sai hosi uma ba hela tiha iha nia inan/aman nia uma hafoin arguidu ba tuir husu deskulpa no rezolve problema ne'e tuir lisan Timor nian no lori fila ofendida ba sira nia uma to'o agora laiha ona problema seluk. Arguidu hatutan tan katak foin primeiravés mai hatan iha tribunál no promete sei la repete hikas nia hahalok ne'e hasoru ofendida iha futuru. Sira iha oan na'in haat no serbisu hanesan to'os na'in laiha rendimentu fiksi kada fulan.

Bazeia ba pedidu hosi prokuradór tribunál presinde ofendida nia deklarasaun, tanba iha produsaun ba prova arguidu konfesa integralmente ba faktu hotu iha akuzasaun no parte defeza konkorda ho pedidu ne'e.

Alegasaun finál

Prokuradór konsidera arguidu provadu komete agresaun fízika hasoru ofendida tuir faktu sira iha akuzasaun. Tanba ne'e, husu ba tribunál atu kondena arguidu tuir pena ne'ebé define ona iha artigu 145 KP.

Entretantu, defeza haktuir katak arguidu konfesa faktu hotu iha akuzasaun, arrepende ninia hahalok, promete sei la komete tan krime hasoru nia membru família ka ema seluk, kolabora di'ak ho tribunál, dame malu ona ho ofendida. Arguidu nu'udar agrikultór, laiha rendimentu fiksi no iha oan na'in haat. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu lori lampra baku dala ida iha ofendida nia hasan parte karuk rezulta kanek kois, bubu, metan no moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, dame malu ona no foin primeravés mai hatan iha tribunál. Tribunál konsidera mós katak sira iha oan na'in haat no arguidu mak hanesan responsavel masímu bá família.

Tanba ne'e tribunál konklui prosesu ne'e no kondena arguidu ho pena multa US\$120.00, ne'ebé kada loron arguidu sei selu US\$1.00 durante loron 120. Tribunál mós fiksa pena alternativa durante loron 80 iha prizaun, bainhira arguidu la kumpri pena multa refere.

7. Krime ofensa ba integridade fízika simples ho natureza violéncia doméstika

Nú. Prosesu : 0022/24.OEPMK
Kompozisaun Tribunál : Singulár
Juis : Dr. Benjamin Barros
Prokuradór : Dr. Mateus Nesi
Defeza : Dr. Afonso Gomes Fatima
Desizaun : Pena prizaun tinan 2 suspende ba tinan 2

Iha 27 Dezembru 2024, Tribunál Judisiál Primeira Instánsia Oekusi, prezide leitura sentesa ba krime ofensa ba integridade fízika simples ho natureza VD ne'ebé envolve arguidu FC hasoru nia feen, iha RAEOA.

Akuzasaun Prokuradór

Prokuradór akuza katak iha 05 Marsu 2024, maizumenus iha oras tuku 23:00 kalan, arguidu fila ba uma ho kondisaun lanu no husu ba ofendida atu halo relasaun seksuál maibé ofendida rezeita tanba mens mai hela. Nune'e ofendida mós toba ona iha kama leten no derepenti arguidu tuku dala ida iha ofendida nia tilun hun parte loos, rezulta ofendida sofre moras. Kazu ne'e aneksa hamutuk ho relatóriu médiku hosi PRADET no fotografia hosi polísia-VPU kona-ba aktu violéncia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a no c), 35(a) no 36 LKVD.

Produsaun ba prova sira

Iha julgamentu, arguidu konfesa faktu sira ne'ebé hakerek ona iha akuzasaun, arrepende ninia hahalok, foin primeiravés mai hatan iha tribunál. Arguidu mós deklara katak seidak dame malu ho ofendida, tanba depoisde akontesementu ne'e ofendida ba hela tiha ho ofendida ninia inan aman. Arguidu tenta atu hasoru ofendida hodi husu diskulpa maibé ofendida lakohi atu hasoru arguidu, nune'e to'o agora sira moris separadu. Sira iha oan na'in haat hela hamutuk ho arguidu, no ofendida hela ho nia inan-aman sira to'o agora. Arguidu serbisu hanesan motorista ho rendimentu kada fulan US\$110.00.

Alende ne'e, ofendida kontinua konfirma faktu sira iha akuzasaun no konfirma mós ho arguidu nia deklarasaun katak depoisde akontesimentu ne'e ofendida ba hela tiha iha nia inan-aman sira no oan na'in haat hela ho arguidu.

Alegasaun finál

Prokuradór konsidera arguidu komete duni krime ofensa ba integridade física simples tuir faktu sira iha akuzasaun tuir konfisaun arguidu nian no konfirmasaun hosi ofendida. Tanba ne'e atu halo prevensaun jerál ba krime refere atu la akontese tan iha futuru, husu ba tribunál atu kondena arguidu tuir pena ne'ebé hakerek ona iha artigu 145 KP.

Entretantu, defeza husu ba tribunál atu kondena arguidu ho pena ne'ebé adekuaudu ho konsiderasaun katak arguidu konfesa, arrepende ninia hahalok, foin primeiravés mai hatan iha tribunál no arguidu tenta atu husu deskulpa ba ofendida, maibé ofendida mak lakohi. Arguidu hanesan motorista ho vensimentu kada fulan US\$110.00 no arguidu mak iha responsabilidade ba iha nia família.

Desizaun

Depoisde avalia faktu sira hotu ne'ebé prodús durante julgamentu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

8. Krime ofensa ba integridade física simples ho natureza violénsia doméstika

Nú. Prosesu	: 0061/24.OESIC
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Mateus Nesi
Defeza	: Dr. Afonso Gomes Fatima
Desizaun	: Pena prizaun tinan 1 suspende ba tinan 1

Iha 27 Dezembru 2024, Tribunál Judisiál Primeira Instánsia Oekusi, prezide leitura sentensa ba krime ofensa ba integridade física simples ho natureza VD ne'ebé envolve arguidu PCM hasoru nia feen, iha RAEOA.

Akuzasaun Prokuradór

Prokuradór akuza katak iha 15 Abril 2024, maizumenus iha oras tuku 18:00 lokraik, arguidu tuku dala ida iha ofendida niaibun rezulta kanek ki'ik, raan sai, bubu no moras. Arguidu kontinua tuku dala ida iha ofendida nia kanotak parte loos rezulta moras. Kazu ne'e aneksa hamutuk ho relatóriu médiku hosi PRADET no fotografia hosi polísia-VPU kona-ba aktu violénsia ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3 (a), 35 (a) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun, arrepende nia hahalok, di'ak malu ona ho ofendida, foin primeiravés mai hatan iha tribunál, nu'udar agrikultór laiha rendimentu fiksi, iha oan na'in ida.

Alende ne'e, ofendida kontinua konfirma faktu hotu iha akuzasaun no deklarata katak to'o agora moris hamutuk laiha ona problema seluk tan.

Alegasaun finál

Prokuradór konsidera hahalok arguidu nian provadu no priense elementu krime ofensa ba integridade fizika simples tuir faktu sira ne'ebé hakerek ona iha akuzasaun. Tanba ne'e, husu ba tribunál atu kondena arguidu tuir artigu ne'ebé hakerek ona iha akuzasaun prokuradór nian.

Entretantu, defeza husu ba tribunál atu kondena arguidu ho pena ne'ebé adekua tanba iha produsaun ba prova arguidu kolabora di'ak ho tribunál no konfesa faktu integralmente. Arguidu mós manifesta arrependementu ba ninia hahalok, iha oan na'in ida, di'ak malu ona ho ofendida, foin primeiravés mai hatan iha tribunál no nu'udar agrikultór laiha rendimentu fiksi.

Desizaun

Depoizde avalia faktu hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, di'ak malu ona ho ofendida no foin primeiravés mai hatan iha tribunál. Tanba ne'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl